

# SLINGERVEL



**Augustus 2018**  
**No 1000!**

**Christelike maandblad vir die jeug**



SLINGERVEL, JAARGANG 60  
 Nommer 1000, Augustus 2018

**A**s julle enige vrae het, iets wat jy nie verstaan nie, of oor iets wat in die Slingervel geskryf is, meer wil weet, is julle baie welkom om vir my

- ⇒ 'n sms te stuur of te whatsapp na 084 551 2107,
- ⇒ of 'n e-pos te stuur na [slingervel@gksa.co.za](mailto:slingervel@gksa.co.za),
- ⇒ of 'n brief te stuur na Posbus 88, Bloemhof 2660



## in hierdie uitgawe ...

- 3 Redakteursbrief
- 4 Verjaardaghoekie
- 8 Hoe het Slingervel ontstaan?
- 9 Die vyfde gebod
- 10 Dawid en Goliat – Blokkiesraaisel
- 12 1958 bekendstelling van Slingervel
- 13 Dawid en Goliat – Doolhof
- 14 Soek die verskil
- 15 Elke luis het sy gespuis
- 16 Oplossing – Soek die verskil
- 17 Oplossing – Blokkiesraaisel Dawid en Goliat – Inkleurprent
- 18 Wat kan ek lees?
- 20 Tuimeltrein-dag

REDAKTEUR  
 Dr. Hennie van Wyk  
 e-pos: [hennie@gksa.co.za](mailto:hennie@gksa.co.za)

Tipografie en uitleg  
 Joey Fourie  
 e-pos: [kerkblad@gksa.co.za](mailto:kerkblad@gksa.co.za)

MEDEWERKERS  
 Maryke Coetsee  
 Susan Lourens  
 Oom Hennie  
 Oom Attie Venter

Eienaars en uitgewers  
 Deputate vir Kerklike Tydskrifte  
 Gereformeerde Kerke in Suid-Afrika  
 Posbus 20008, Noordbrug 2522

Drukkers  
 V & R Drukkery  
 Tel. 012 333 2462  
[ludick@vrprinting.co.za](mailto:ludick@vrprinting.co.za)

Intekening  
 Administratiewe Buro  
 Afdeling Publikasies  
 Posbus 20008, Noordbrug 2522  
 Tel: 018 297 3986

Intekengeld  
 R319,00 per jaar  
 (posgeld en BTW ingesluit)  
 R115, 00 per jaar  
 (elektroniese intekening)

Die Redakteur  
 Bydraes en briewe  
 Posbus 20008  
 Noordbrug, 2522

Jaargang 60,  
 Nommer 1000  
 Augustus 2018

ISSN 0037 685 X

# REDAKTEURSBRIEF



Maats!

**K**yk 'n bietjie op die linkerkantste bladsy. Sien jy die foto van die voorblad? Kyk bietjie wat staan onder die foto: Slingervel Jaargang 60. Uitgawe 1000.

Dit beteken dat jy nou in jou hand die duisendste uitgawe van die *Slingervel* in jou hand hou, en dat dit 60 jaar geneem het om daar te kom.

60 jaar. Vra bietjie vir Oupa en Ouma hoe oud hulle is? Nou het jy 'n idee van hoe oud *Slingervel* is. Is dit nie wonderlik hoe die Here ons tydskrif jaar na jaar gebruik om met ons kinders te praat nie! *Slingervel* was vir my wonderlik toe ek hom as kind gelees het!



Hier is die voorblad van ons 1958-uitgawe: hy het ook in Augustus verskyn.

Hy het 1 sjieling gekos. Ja maats, ek dink nie julle ken hierdie woord nie! In 1961 het Suid-Afrika 'n republiek geword. Voor dit was ons 'n Britse kolonie en het ons die Britse geldeenhede gebruik: ponde, sjielings en pennies.

Toe ons in 1961 oorgeskakel het, moes ons 'n bietjie sommetjies maak! Daar was 12 pennies in 'n sjieling en 20 sjielings in 'n pond. Toe ons oorskakel, was daar 100 sent in 'n rand. 12 pennies moes 10 sent word en 'n pond was 2 rand. Weet julle dat ons 'n ½ c-muntstuk gehad het?

Kom ons kom terug na die *Slingervel*: Hy het 10c gekos! Ons kleinste muntstukkie vandag!

Hy het 24 bladsye gehad en op die agterblad die katkisasielesse vir die maand.

Mag die Here nog lank ons tydskrif in sy Koninkryk gebruik om kinders van Hom te leer, en hoe wonderlik sy skepping is.

Groetnis!





Dr. CN van der Merwe, redakteur van Januarie 2000 tot September 2013

### Die redakteurs van die Slingervel

Sedert die ontstaan van die *Slingervel* in Augustus 1958 was daar al vyf redakteurs wat verantwoordelikheid vir die tydskrif geneem het.

Hulle is: *Oom Klaas* (dr. KS van Wyk de Vries: Augustus 1958 – Maart 1961), *Oom Sarel* (prof. SJ du Plessis: April 1961 – Desember 1965), *Oom Pieter* (prof. PW Buys: Januarie 1966 – Desember 1999) en *Oom Nico* (dr. CN van der Merwe) sedert Januarie 2000. Van al die redakteurs was Oom Pieter die langste in beheer, naamlik 33 jaar. Van Februarie 2014 af is *Oom Hennie* (dr. HF van Wyk) die redakteur.

Mag hierdie tydskrif nog lank in Gereformeerde huise gelees word! <sup>sv</sup>



Dr. HF van Wyk, redakteur van Januarie 2014 af

# Die vyfde gebod

Oom Hennie

Maats

Hierdie gebod kan sooooo maklik verkeerd gebruik word! Dit kan soo maklik as 'n lat gebruik word. 'n Lat maak seer. Onthou net dat God nie een van die gebooie gegee het om seer te maak of sy kind te benadeel nie. Ook nie die vyfde gebod nie.

Wat baie waar is, is dat die duiwel die hardste werk waar ons mekaar moet liefhê.

Die eerste plek waar jy met liefde te doen gekry het, was by die huis. En dis die eerste plek waar die duiwel die liefde wil vernietig.

Nou is dit so dat jy nie altyd mooi verstaan as Pa of Ma "nee!" sê nie. Nou mag jy mooi, baie mooi, vra hoekom hulle so sê. As 'n mens dit nie doen nie, kan jy dalk dink dat dit 'n gaping is tussen jou en jou ouers: Hulle verstaan jou nie en jy verstaan hulle nie. As ons mekaar liefhet, moet ons ook mekaar verstaan.


Die Here begin by die ouerhuis waar die liefde die sterkste is. Waar 'n mens mekaar kan vergewe en verdra, al maak ons foute. Maar daar is meer: kerk, skool, regering.

Ons moet beseft dat die Here mense gebruik om vir ons 'n omgewing te skep waar ons kan leef en werk. Ek moet kan luister omdat die Here hulle daar gestel het. <sup>sv</sup>

Generasie gaping!  
Generasie gaping!



Die gaping wat my  
bekommer is ...



Die gaping van  
hier tot hier



# Tuimeltrein-dag



Nie net leer ons dat **16 AUGUSTUS** Tuimeltreindag is nie, ons leer ook sommer 'n nuwe woord! Tuimeltrein! Dis vir my die mooiste Afrikaanse benaming vir “roller coaster” – 'n slimkop-woord wat jy lekker kan gebruik volgende keer wanneer jy en jou gesin of maats weer 'n draai by Gold Reef City gaan maak.

16 Augustus 1898 word gevier as die dag waarop Edwin Prescott 'n patent ontvang het vir die “loop-de-loop” – 'n tuimeltrein wat 'n onderstebo draai kon maak.

Vandag se tuimeltreine word ontwerp in die vorm van 'n spoorpad hoog in die lug, met skerp draaie, steil opdraandes en soms onderstebo draaie. Mense sit gewoonlik in oop waentjies, en dié opwindende ritte word in pretparke regoor die wêreld gevind. Daar is ook sterk kompetisie tussen pretparke om die wenner van die vinnigste, hoogste, wildste of mees vreesaanjaende tuimeltreinrit te wees.

Tuimeltreinritte word ook ingedeel in hoogtes. 'n “Hyper coaster” het 'n hoogte van meer as 61 meter, terwyl 'n “giga coaster” meer as 91 meter die lug in strek. Nes jy na jou asem snak en dink dis rof, is daar ook 'n “strata coaster” wat jou maag behoorlik sal laat draai met 'n hoogte van 120 meter. Dis omtrent so hoog soos wat jou skool se rugbyveld lank is!

Die wêreld se hooste tuimeltreinrit op die oomblik is Kingda Ka (foto regs) by Six Flags Great Adventure in New Jersey, Amerika. Hierdie monsterrit neem jou 139 meter die lug in, voordat jy teen 206 kilometer per uur af aarde toe skiet. Dit is ook die tweede-vinnigste tuimeltreinrit ter wêreld.

Hierdie is waarlik 'n waansinnige rit, as jy in ag neem dat Suid-Afrika se hoogste rit, die Golden Loop, maar 42 meter hoog is en ons vinnigste rit, die Tower of Terror (foto bo), slegs 95 kilometer per uur bereik (albei is by Gold Reef City in Johannesburg).

So, as atletiekbyeenkomste en eksamens nie genoeg opwinding is om jou maag te laat draai nie, is daar altyd 'n adrenalienbelaaide tuimeltreinrit! <sup>sv</sup>

